

長樂縣志卷之三

大事志 災祥附

長樂自建邑以來罕遭兵燹惟有明嘉靖末葉至於清初百餘年間倭夷犯順海寇跳梁沿海居民屢遭蹂躪遞遷遞復靡有寧居此則長邑之創鉅痛深者也舊志攙入祥異今將歷年寇警撮著於篇而以災祥附焉志大事

明成化十七年癸丑四月十一夜海寇掠江田人家 嘉靖三十二年癸丑夏四月海賊劫二十都小社 三十四年乙卯十一月倭夷寇海口本縣募義兵往援應募者多感恩人初戰少捷再戰於龍江橋橋隘已非戰地會水兵銃發煙罩賊乘煙奮擊兵遂潰

三十五年丙辰正月十三日海口倭夷由本縣石尤嶺逾閩縣欽仁里遁去 三十六年丁巳三月倭夷千餘自浙東至福寧登岸焚劫洪塘等處迫福城外擁巨艦銜尾揚帆下馬江艤瀛前三日分數十小舟入諸港寇二都三都殺十人沿鎮入海 四月文石松下南賊水陸沓至居民奔竄 十月倭夷突至洋崎邑城戒嚴僉事盛唐提兵駐馬江亭次日兵從二都三都往福清沿途剽劫焚三都民居 三十七年戊午四月倭夷千餘由閩安鎮焚劫瀛前卒至邑城下沿長嶼江至坑田焚舟登岸摻羅芹山絕頂度石尤嶺往福清城陷 五月初二日倭夷一千餘由六都竹田嶺八都礮嶺二路入屯三溪將逾感恩迫縣治舉人石震生員曾汝魯

等率衆斷橋禦之憑溝夾岸以戰又從六都催兌溝進遇古縣下村青山下民兵戰北歸屯三溪十二日分四路遁去一由竹田嶺一由礪嶺一由大溪山嶺一由長林湖俱往福清二十七日入海參將尹鳳秦經國田某等督舟師邀擊至江田澳會都指揮使黎鵬舉將舟師南旋夾擊遂破之沉賊舟過半時巡撫王詢有諭感恩民兵文三十八年己未三月至六月倭夷先後由福寧度鼓嶺焚劫福城外浮馬江而下復從閩安鎮瀛前入三叉港又循福清出礪嶺抵三溪等處布滿南北鄉自增礮邃谷以至遐陬僻巷悉搜剔無遺又淫雨滄霧兵火逾三月骸骨相望四月二十六日迄二十九日日夜攻城先贛州守備來熙帥兵入守用鳥鎗擊傷

百餘賊解去城上被傷者十餘人自守備至解嚴七十餘日間落居民暨閩縣福清連江附近居民避賊入城者衆蒸染成疫每日四門出百餘屍三十九年庚申四月倭夷寇北鄉巡撫劉燾帥親兵馳馬挾弓赴之遇賊於壺井山下應弦斃二酋賊方駭潰而我師旋歸矣賊得乘汐由七都仙橋逾八都礪嶺遁去六月初四日漳南海賊劫沚頭初八日劫小祉夜半復襲劫小祉殺數人擄數十人入海秋上官移文停罷催徵四十年辛酉四月二十四日倭夷寇北鄉二十五日寇西南鄉殺掠無算二十六日越石尤嶺往福清五月十八日復寇北鄉十九日乘汐至七都仙橋逾八都由礪嶺往福清四十一年壬戌四月十四日倭夷寇北鄉由

十四都乘汐突至江田往福清又至二十都屯汴頭山千戶孟某巡簡范鶴率兵戰於燕石鄉兵助之賊劫奪漁舟入海是秋賊久屯福清浙福副總兵戚繼光帥兵勦捕兵駐邑城經二都三都四都五都秋毫無犯焉夜薄賊營殲之凱旋復經邑治士民歡迎嗣是屢戰屢捷夷氛漸息冬戚入浙募兵興化城陷 四十二年癸亥三月倭夷寇二十都二十八日寇十九都擄四十餘人四月巡撫譚綸蒞鎮戚兵至自浙大破賊於平海復興化城 崇禎三年庚午六月海賊登松下居民禦之退八月初十日都海佬又以百餘船登從山倒圍死傷甚衆 四年辛未七月初二日海寇復登松下殺人放火 六年癸酉六月二十二日海賊劉香駕船三百

號自定海所抵梅花澳而入內港焚燒民屋後山澳民集莆盛山禦之本地得不入 九年丙子劉香大夥賊船登松下澳殺人放火居民逃竄三日絕烟

清順治七年庚寅海寇掠沙京等鄉人多入雲梯洞避之 十一年甲午海寇甘藍郝等由十都抵北鄉聚嘯馬山履畝派糧時北鄉農民田受兩賦 十八年辛丑海寇沿岸剽掠冬十月命沿海居民遷內地北從雁山抵金峰南至大嶼轉壺井直至三溪爲界絡繹設八寨 康熙元年壬寅海寇又蜂起復命八寨居民內遷北至鶴嶺南至六都井門爲界惟二三四五等都免遷 九年庚戌命調復八寨 十一年壬子海寇又熾復移八寨居民東以渡橋

旒峰等處爲界 十三年甲寅耿藩變派民爲夫無寧日 十七年戊午耿逆平海寇復熾重遷沿海居民又以鶴嶺爲界 二十年辛酉重復自順治十八年遞遷遞復至是沿海居民盡復故土
災祥_附

唐建中三年六月大旱井泉竭人渴且疫 開成五年蝗疫 乾符五年十二月黃巢入福州邑民騷擾奔竄
宋至道二年大雨黑豆 元豐八年十月五都東庵荔枝有實三十顆 元祐八年海風駕潮害沿海塘田 大觀八年大旱 紹興二年饑斗米千錢軍饟繁急民益艱食監司移廣粟以濟 六年仍饑令部使者漕廣粟以濟 隆興二年正月不雨至於七月

乾道三年八月淫雨禾菽腐 淳熙四年五月大雨漂崩溪澗之田塘禾生耳 十年八月己未雨至於十月乙丑 十一年旱次年饑無麥 十四年旱 十六年五月大霖雨 紹熙二年四月霖雨至於九月 五年九月雨至於十月 十一年四月不雨至於八月 開禧元年旱 嘉定十一年饑人食草根 十四年大旱 十六年秋大水壞稼 紹定三年蝗 嘉熙四年大旱 淳祐十一年旱 寶祐元年旱 咸淳十年大旱冬十月地震 德祐元年地復大震

元元明二年饑賑粟 大德六年大饑 至正四年三月不雨至於八月夏秋大疫 十四年大饑 二十七年十月丙辰雷雨地震

十二月庚午又震有聲如雷

明洪武九年丙辰風雨大作傷稼 十七年甲子六月十五夜雨大作海水漲溢隄防 二十年丁卯夏大旱民饑 二十一年戊辰七月淫雨五晝夜水漲異常傷稼 永樂十年壬辰首石山鳴讖云首石山鳴出大魁十洋成市狀元來是年山鳴適三寶太監駐軍十洋街人物輳集如市是科邑人馬鐸狀元及第戊戌又鳴邑人李騏亦狀元及第 十二年甲午大旱 景泰二年辛未夏旱 六年乙亥大旱連年不雨建劍人販米入境斗米十文錢人賴以濟 成化十二年平地起一山高二丈餘橫廣八尺山旁一池忽生大蜺味最佳人爭取食不數日患痢死者千餘人 十六年

庚子十八都昆由里平地突起小阜高三四尺人畜踐之輒陷鄉人聚觀以爲異明年復於左湧起一山廣袤五丈餘是年傍近居民大疫 十八年壬寅七月大雨至八月朔漂禾稼壞公私屋宇先是十一年二都半占山裂至是崩壓居民廬舍死者二十七人 十九年癸卯六月十九日大風雨拔木發屋濱海夷蕩尤甚 二十一年乙巳三月雨至閏四月浸傷禾苗繼復大疫十月丁未地震起自西北有聲 二十二年丙午春旱五月以後大旱 二十三年丁未春旱無麥秋旱無禾民大疫 宏治十一年戊午春十九都靈峰高頂產芝三本夏旱 十二年己未五月不雨至於十月大饑上官移汀郡粟以濟 十五年壬戌十月馬江賊劫渡

舟殺十六人 十六年癸亥正月十九日夜馬江大風覆舟二月
大雹 十八年甲子七月大水半月不退禾稼淹腐 正德二年
丁卯旱 四年己巳禾稼吐穎被烈風傷殘事奏蠲租之半 七
年壬申夏大旱 九月甲戌春夏大疫 十年乙亥二十三都陳
塘港沙合古讖云陳塘沙港合士子勝莆田相傳爲多士彙征之
兆 十二年丁丑春大旱 十三年戊寅六月十九日夜分海潮
突入高二十餘丈聲震若雷淹近海民居大饑知縣曹**鉞**請賑是
年春廳事前枯荔重榮 十四年己卯春霖雨霜雪六十餘日
十六年辛巳旱 嘉靖四年乙酉梅花海水忽赤經旦復清魚蝦
可數 五年丙戌正月雨至於四月五月不雨至於七月田禾無

實知府汪文盛奏蠲是年田租 六年丁亥春地大震 七年戊
子旱 九年庚寅四月初七日晡太常山鳴 十六年丁酉夏四
月不雨至七月禾絕收 十七年戊戌春旱 十八年己亥六月
日午驟雨大作轟雷閃電六都前山火起石礮上數處並起煙焰
甚烈雨盛而火益熾閏七月十八日颶風拔木壞官民屋宇橋道
塘岸崩陷 二十年辛丑獨長樂春雨至四月十五日止是月十
六日旱至次年癸卯四月二十八日乃雨連年饑饉疫疾間作
二十三年甲辰春疫旱田多曠耕麥秕五月十六日乃雨六月中
旬磁澳海水翻魚蝦皆斃颶風繼作復大疫十一月二十五日雷
震十二月初二日地震 二十四年乙巳自舊年十月不雨至是

年三月民疫無麥穀價騰踴民鬪草根屑木皮食之道殣相屬巡按何維柏檄官分賑 二十九年庚戌自舊冬不雨至是年春無麥五月六月不雨田禾枯槁 三十六年八月十九都金漆湖產嘉禾二畝許秀而實其種非里中所有或云蒹葭幻成 三十七年九月民間鬩傳馬騮精爲祟逖邇鳴金擊鼓若防巨寇者十餘日 十月雷震 十一月地震 十二月松下民陳天養偕幼子樵於煙墩山遇暴風忽失其子是夜暴風掣戶又失其父後謁巫治之竟無所得 三十八年五月二十一日大風雨七日夜平地水流有聲廬舍傾頽 四十四年乙丑秋西隅火延燒民屋百餘間 隆慶五年辛未夏旱 萬曆元年癸酉三月東隅鄭大智家

產芝一本 二十二年甲午大饑貧民多搶穀撫院金學曾准生員鄭建邦呈請發本縣倉賑給軍民各縣體例又新得番薯種教民栽種秋收大獲名曰金薯 三十年壬寅八月二十五日大風覆舟 三十四年丙午春二十三都後山地突生猪毛遍野次年亦然 三十六年戊申十八都東山洋平園突起高四五尺圍六丈餘 四十二年甲寅九月二十一日後山民房發火燒菌存其藁少頃龍從鼓尾潭起大雨滅火魚船四隻爲龍攝去墜地粉碎又攝網戶鄭進德過二里餘墜田中擡回十餘日尙極臭如銅 崇禎五年壬申三月麥將熟大雨雹如拳從連江縣治過莆盛山幾半邑麥無粒收 十二年己卯八月十六日風雨怪作拔樹發

屋海邊尤如洗 十四年辛巳八月初一日大風拔木飄瓦壞廬舍甚多

清順治五年戊子春旱 十六年己亥七月二十八日颶風作 康熙十八年己未五月大風 十九年庚申大水 三十年辛未大風發屋 三十五年丙子旱無秋 四十五年丙戌春旱禾未插 四十七年戊子疫 六十年辛丑正月二十七日大雨雪是年大有秋 雍正元年癸卯夏大水 六年戊申正月二十八日大雪六月初四日白龍現空中鱗甲俱見秋旱 乾隆二年丁巳八月十五日夜颶風海漲沿海人居多飄溺 三年戊午五月東隅鄭銘書館井出醴泉 五年庚申五月朔辰刻日食既 七年壬

戌夏蝥禾不花 八年癸亥冬彗星昏見西方 十二年丁卯秋旱早晚缺收免賦冬十五都涸井中湧甘泉 十五年庚午八月初八夜大風 十六年辛未七月十四日大風雨 十七年壬申秋大水 十八年癸酉疫 二十年乙亥八月十六夜有星孛於南方明如月 二十五年庚辰七月初九日午刻十六都華齡寺前龍起挾小兒空中丈餘墜下 四十八年癸卯夏風災拔木壞屋 五十九年甲寅秋八月大雨一日夜溪水漲溢淹壞汾陽王後殿冲倒太平橋亭 六十年乙卯夏大饑穀貴每挑價三千六百文 嘉慶九年甲子夏秋大雨芝山六平山皆有崩陷 十四年己巳六月十八日辰刻風災拔木屋瓦如飛屋簷如簸幸止一

時許十五年庚午春正月念九夜雷電大雨雹樣如雞子秋七月初六夜彗星如帚天河邊射入西長丈餘九月河南林清教匪變十月詔拿朱毛俚二十年乙亥春夏不雨早稻絕收二十二年丁丑秋九月初七夜縣吏戶禮三房儀門一座被火延燒二十五年庚辰秋七月吐瀉盛行起西門漸移東門人死極衆至九月遍南北鄉十月始息道光元年辛巳秋吐瀉又作四年甲申自夏至秋不雨六年丙戌大饑穀價每挑三千六百文十年庚寅秋疫盛行十二年壬辰正月初六日大雪約二尺三月饑穀價每挑三千文八月近海一帶鹹潮漫入平洋田廬盡淹十四年甲午歲饑每挑穀價四千文五月大水七月鹹潮湧起

十餘丈壺井棺木漂至北山一路蛙鼃蛇蠍斃死不計其數潮退兩日臭不可聞十六年丙申春夏大旱秋吐瀉大作十七年丁酉春夏瘟病盛行十八年戊戌瘟疫大作二十九年己酉冬癘盛行三十年庚戌除夕大雪咸豐元年辛亥正月朔日有食之秋冬之交吐瀉大作二年壬子夏風災三年癸丑六月十九日大風雨損禾稼至七月初一始霽南向垣墻損壞者十有八九未幾延平變起四年甲寅五月初三日大雨傾盆太平橋欄被溪水衝折橋下塘壞水淹司馬第下馬道人家低者有八九尺高者亦有尺餘五年乙卯春夏不雨早晚稻絕收遍地皆種紅薯秋薯蟲遍生大如姆指薯葉被食殆盡先是天雨荳次日

荳皆變成蟲卵以致蔓延冬至以後變爲蛾縮若花生仁土人煨而食之味甚甘香種遂絕是歲大饑穀價每挑三千六百文八年戊午彗星入文昌宮十年庚申有彗星射紫薇垣十一年辛酉日月合璧五星聯珠同治二年癸亥正月十五日大雪深一尺餘二年甲子三月十八日大雨雹自閩邑入境歷陽夏龍門等鄉從風門嶺沿海東北而去他鄉無異六月二十五日大風至七月末止屋破墻崩不計其數七年戊辰秋洽嶼一帶海潮漫入八年己巳春夏大雨水秋旱北鄉一帶薯蟲又生光緒三年丁丑八月十五夜颶風大雨二日始止八年壬午七月初四日至初八日大雨河水漲高數尺十年甲申七月蚩尤旗星

出東方光長約二丈大數尺十五年己丑八月早晚稻歉收十八年壬辰十一月二十八夜大雪深一尺餘二十一年乙未四月念七日大雨雨日河水漲高數尺二十八年壬寅正月至三月不雨早稻歉收宣統元年己酉八月初二日颶風爲災壞廬舍沉船隻甚多二年庚戌五月旱早稻歉收三年辛亥正月初一日雷鳴

民國元年壬子六月二十七日大雨二日河水漲高三尺餘三年甲寅六月早稻熟而未刈大雨三日水深沒禾穀盡生芽五年丙辰秋旱晚稻歉收